



**Sumáriu Kazu
Tribunál Distritál Oekusi
Outubru 2019**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 7*

Tipu kazu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika.	1
Artigu 153 KP	Maus tratus ba inkapáz	1
Artigu 179 & 182 KP	Abuzu seksuál ba ema ne'ebé la bele reziste ho agravaun	1
Artigu 316 KP	Kontrabandu	3
Artigu 259 KP	Danu agravadu	1
Totál		7

2. Totál desizaun ne'ebé JSMP monitoriza : 1

Tipu desizaun	Númeru
Pena prizaun (Artigu 66 KP)	-
Suspensaun ba prizaun nia ezekusaun (Artigu 68 KP)	1
Pena multa (Artigu 67KP)	-
Pena admoestasun (Artigu 82 KP)	-

* Sumáriu Kazu ne'e prodús ho númeru limitadu tanba aleinde JSMP tun Dili hodi partisipa iha atividade balun, TDO rasik mós la marka oráriu julgamentu. Aleinde ne'e, kazu balun adia tanba prokurador moras no juis partisipa iha funeral husi Dr. Guelhermino da Silva nu'udar Juis Tribunál Rekursu ne'ebé hakotu iis tanba moras.

Totál	1
--------------	----------

3. Totál kazu sira ne'ebé adia tuir JSMP monitorizasaun : 0

Razaun adiamentu	Númeru
Totál	0

4. Total kazu sira ne'ebé kontinua prosesu tuir JSMP nia monitorizasaun: 6

B. Deskrisaun sumáriu ba desizaun kazu sira ne'ebé JSMP monitoriza:

1. Krime ofensa ba integridade física simples ho natureza violénsia doméstika

Nú. Prosesu : 0029/18.OEPSB
 Kompozisaun Tribunál : Singulár
 Juis : Dr. Eusébio Xavier Vitór
 Prokuradór : Dr. Jose Elo
 Defeza : Dr. Calisto Tout
 Desizaun : Pena prizaun fulan 6 suspende ba tinan 1

Iha 03 Outubru 2019, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu BMC hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 22 Outubru 2018, maizumenus iha oras tuku 19:00 kalan, arguidu basa dala rua iha lezada nia hasan loos no hasan karuk. Hafoin, arguidu rakut lezada nia fu'uk no tuku dala ida iha ulun. Antes ne'e, lezada fila husi to'os no arguidu diskonfia lezada amante ho mane seluk. Aktu sira ne'e, rezulta lezada sofre moras iha hasan rua, fu'uk no ulun no lezada ba keixa iha Esquadra Polísia-Passabe.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu sira hotu iha akuzasaun prokuradór nian no arrepende ninia hahalok. Arguidu mós hatene katak kuandu baku ema seluk nia isin bele halo ema ne'e sofre moras ka kanek maibé arguidu halo agresaun ne'e hasoru lezada. Arguidu mós deklarara katak depoisde akontesimentu ne'e liutiha lora rua arguidu dame malu kedas ho lezada no to'o agora la akontese tan krime hasoru lezada. Arguidu serbisu nu'udar profesór ho rendimentu kada fulan US\$204.00 no sira iha oan na'in rua. Arguidu promete ba tribunál katak sei la halo tan krime hasoru nia feen iha futuru, primeiravés komete krime no mai hatan iha tribunál.

Aleinde ne'e, lezada mós kontinua konfirma faktu sira hotu iha akuzasaun prokuradór nian no konfirma mós ho arguidu nia deklarasaun katak liu lora rua sira dame malu kedas no to'o agora arguidu la halo tan krime hasoru lezada.

Bazeia ba prokuradór nia pedidu, tribunál presinde depoimentu husi testemuña tanba iha produsaun ba prova sira, arguidu konfesa faktu sira totalmente no konfirmadu husi lezada rasik.

Alegasaun final

Prokuradór konsidera arguidu provadu halo agresaun fízika hasoru nia feen tuir faktu sira ne'ebé hakerek ona iha akuzasaun. Haree ba sirkunstánsia hirak ne'e, liu-liu tanba krime violénsia doméstika akontese iha fatin-fatin no envolve edukadór ida. Tanba ne'e, atu halo prevensaun jerál ba krime ne'e, husu ba tribunál atu aplika pena prizaun fulan neen suspende ba tinan ida fulan neen.

Entretantu defeza haktuir katak arguidu konfesa faktu sira hotu iha akuzasaun no arrepende ona ninia hahalok. Arguidu mós promete sei la halo tan krime hasoru nia membru família ka ema seluk no arguidu kolabora di'ak ho tribunál. Aleinde ne'e, arguidu mós deklara katak dame malu ona ho lezada no iha oan na'in rua. Tanba ne'e, husu ba tribunál atu aplika pena ne'ebé adekuadu ba arguidu.

Desizaun

Tribunál prova katak arguidu provadu komete krime ofensa ba integridade fizika simples hasoru nia feen tuir faktu sira iha akuzasaun hanesan arguidu basa dala rua iha hasan loos no hasan karuk. Tribunál mós prova katak arguidu mós rakut lezada nia fu'uk no tuku dala ida ihaulun. Bazeia ba faktu provadu sira ne'e no konsidera ba sirkunstánsia agravante no atenuante sira hanesan arguidu konfesa, arrepende ona ninia hahalok, dame malu ona ho lezada, promete sei la repete iha futuro, kolabora diak ho tribunál, foin primeiravés komete krime hasoru lezada, iha oan na'in rua no serbisu nu'udar profesor, tribunál konklui prosesu ne'e no kondena arguidu ho pena prizaun fulan neen suspende ba tinan ida.

Atu hetan informasaun kompleitu, favor kontaktu:

Casimiro dos Santos

Diretór Interino Ezekutivu JSMP

Diresaun e-mail: santos.cas76@gmail.com

info@jsmp.tl

Telefone:3323883 | 77257466